

涉又查光緒二十二年通商行船條約第四款載有日本臣民准在中國通商口岸所定外國人居住地界之內租地起造禮拜堂醫院墳塋等語是准日本人起建自行禮拜之堂尙於約內載明限定在中國通商口岸外國人居住地界之內日本人如應赴內地傳教斷無不於約內載明之理貴領事若將通商行船條約第二十九款與通商行船條約續約第九款互相參觀當知所謂優例豁除利益約內業已事事指明與傳教全不相涉條約具在斷不能將有明文者置而不論而撰約外之詞且日本僧人收徒以來屢生事端如不即行撤回將來必蹈教與教鬩教與民鬪之覆轍以貴國與中國睦誼之敦自應思患預防以善其後相應照會貴領事查照施行至陳穰一案已飭由洋務局委員查辦以期速結矣須至照會者

浙江巡撫聶札藩司歸安教堂購地速行議結完案文

光緒三十年十二月初七日准外務部咨開美教士買地歸安縣出示勒限一案迭經本部電咨貴撫查明核辦在案本年十一月二十六日復據刑部主事朱方貽等呈稱原籍紳士來函教士所築圍牆除由官逼賣擅賣之外更有白佔情形許道在滬集議該教士韓德明投函縣署聲稱即欲動工經縣稟報而省憲迄未照會領事請咨催派員會同府縣將圍佔

各地悉數劃還等因查此案懸擱日久迄未辦結應飭查勘明確照會美領事安速議結以清積牘而順輿情相應抄錄該主事等原呈咨行貴撫查照核辦並聲復本部可也等因到本部院准此抄就轉行爲此仰司官吏查照准咨事理立即移飭遵照迅速議結完案並將辦理情形先行詳咨母延

刑部主事朱方貽等公呈附錄

竊美教士韓明德於湖州府城內買地由官出示勒限逼賣並擅賣學校祠宇公地經職等於本年六月初旬具呈都察院當蒙咨由大部轉咨浙撫查辦在案近接原籍紳士來函據稱是案於六月下旬蒙洋務局派員來湖會同府縣履勘並加丈量始知教士所築圍牆之內約有地一百二十餘畝而府學舊有公地實不止十畝零檢查縣卷則教士投稅之地合計只四十八畝零加以前署縣朱令懋清所擅賣之十畝零總計尙不滿六十畝然則圍牆之內除由官逼賣擅賣之外教士更有白佔情形當經郡紳徐巽言等稟明印委各員請卽據以向教士理說嗣由洋務局總辦許道憲等在上海集議並邀同西人李提摩太李佳白等代爲排解乃韓明德不顧公論屢次梗議近日復投函縣署聲稱卽欲動工經縣稟報而省憲迄未行文領事惟希冀就滬議結案延日久衆皆屬目若不聽

官核辦遽自起造羣情必深憤恨萬一激動衆怒釀成巨案思之可爲寒心因復寄信來京囑職再向大部呈請咨催浙撫速予核辦職等查教士傳教本係勸人爲善自應恪守教規乃如該教士韓明德始則妄引一蘇省章程請官出示勒限逼賣繼則挨價認領學校公地拆毀舊有祠宇並佔及其餘官荒各地所爲均出情理之外必須行文領事據理申斥方爲正辦若一味含糊息事殊非政體且該教士不候核辦遽自動工尤爲有意搆怨挑釁該紳士等恐激衆怒不能不顧爲此懇恩咨催浙撫札行洋務局照會駐杭美領事查取該教士所稱蘇省章程先行照復仍飭該教士靜候委員查辦一面派員蒞湖會同府縣調閱投稅契據按照教士呈縣地圖逐戶丈明分別有無原單舊契其無原單舊契者卽非的實產主應將原地吊回入官原價追給教士如果單契完全的係產主並出情願非被官逼卽照契載畝數丈給其餘圈佔各地悉數劃還以順民情而弭教案謹上直隸總督袁摘錄律例禁止教民滋事示

案查約載中國習教民人凡中國律令之事仍由地方官照例懲辦等語是教民與平民同爲朝廷赤子地方官凡遇民教涉訟之案卽照律例一律辦理其案內所犯情由本與習教不相干涉至耶穌天主兩教在外洋雖分新舊兩派而意在勸人爲善則一習教之人雖有